

瑜伽師地論本地分菩薩地真實義品講義十八(2013)

一、三種法相〔解深密經一切法相品；瑜伽卷76〕

謂諸法相略有三種。何等為三？一者、徧計所執相，二者、依他起相，三者、圓成實相。

云何諸法徧計所執相？謂一切法名假安立自性差別，乃至為令隨起言說。

云何諸法依他起相？謂一切法緣生自性，則此有故彼有，此生故彼生。謂無明緣行，乃至招集純大苦蘊。

云何諸法圓成實相？謂一切法平等真如。於此真如，諸菩薩眾勇猛精進為因緣故如理作意無倒思惟為因緣故，乃能通達；於此通達漸漸修習，乃至無上正等菩提方證圓滿。

●眩翳喻

如眩翳人眼中所有眩翳過患，徧計所執相，當知亦爾。

如眩翳人眩翳眾相，或髮毛輪、蜂蠅、芎藭，或復青黃赤白等相差別現前，依他起相，當知亦爾。

如淨眼人遠離眼中眩翳過患，即此淨眼本性所行無亂境界，圓成實相，當知亦爾。